

Inatsisissatut siunnersuummut oqaaseqaatit

Nassuiaatit nalinginnaasut**1.Aallaqqaasiut**

Nunatsinni umiarsualiviit nassiussanik tiguisinnaanissaat umiarsuakkullu nassiussiffiusinnaanissaat, imarsiorluni inuussutissarsiorfinnik, taakkunungalu ilanngullugu aalisarnermik inuussutissarsiorfinnik angisuunik sullissisinnaanissaat, kiisalu imaatigut angallannikkut ilaasunik kiffartuussisinnaanissaat Naalackersuisunit anguniarneqarpoq. Taamaattumik umiarsualivinnut aningaasaliinissaq pisariaqarpoq. Aningaasartuutissat Nunap Karsianit naammassineqarsinnaanngippata, umiarsualiviit arlallit aningaasaqarnikkut imminnut nammassinnaaffissaannik, taamaalillutillu aserfallatsaaliuinnermut, ingerlatsinnermut, nutarterinnermut immaqalu alliliinnermut aningaasartuutunik akiliisinnalernissaannik nassaartoqartariaqarpoq.

SIKUKI Nuuk Harbour A/S nunatsinni umiarsualiviit sinnerini atuisunut akiliuteqartitsisarnermik atulersitsinissamik tapersiinnaasunik immikkut ittunik piginnaaneqarfeqarpoq misilittagaqarlunilu. Sikuki Nuuk Harbour A/S-imut inatsisitigut tunngavissaq atuuttoq naapertorlugu ingerlatseqatigiiffik taamaallaat Nuummi umiarsualiveqarnermi attaveqaasersuutunik pigisaqarsinnaavoq. Tamanna Sikuki Ports A/S-ip Nuup avataani umiarsualiveqarnermi attaveqaasersuutunik pisisinnaassappat, taarsigassarsisinnaassappat, sanaartorsinnaassappat ingerlatsisinnaassappallu akornusiisussaavoq. Taamaattumik illoqarfiit pingaarnersaat kisimi Sikuki Nuuk Harbour A/S-ip niuerneramik tunngaveqarluni umiarsualivinnik ingerlatsinissamut piginnaaneqarfigilersimasaanik iluaquteqarsinnaavoq.

“SIKUKI Nuuk Harbour A/S aamma Nuummi umiarsualiviliorneq pillugit Inatsisartut inatsisaat”-nut matumunnga allannguutissaatut siunnersuummi Sikuki Nuuk Harbour A/S-ip nuna tamakkerlugu umiarsualivinnik sanaartorsinnaanissamut, pisisinnaanissamut, pigisaqarsinnaanissamut ingerlatsisinnaanissamullu inatsisitigut tunngavissaqalernissaanut qulakkeerinissaq, tamannalu aqqutigalugu imarsiornermi attaveqaasersuutunik nukittorsaanissaq siunertarineqarpoq. Taamatut siunnerfeqarnermut naapertuuttunngorlugu ingerlatseqatigiiffik siunnersuummi Sikuki Ports A/S-imik taagorneqarpoq.

Taamaalilluni Naalackersuisut piginnaaneqarfinnik, Sikuki Ports A/S-ip pigilersimasaanik, nuna tamakkerlugu niuerneramik tunngaveqarluni umiarsualivinnik ingerlatsinissamik tapersiinnissamut atuisinnaalissapput. Niuerneramik tunngaveqarluni umiarsualivinnik ingerlatsinnermik atulersitsinikkut, inuussutissarsiorlut pisariaqartitaannik naammassinninnissaq, kiisalu umiarsualivinnik piffissamut naleqqutilernissaannik isumannaallisaanikkullu isumannaatsuunissaannik qulakkeerinissaq siunertarineqarpoq, nunap karsia aningaasaqarneranut aningaasartuutunik kinguneqarsinnaasunik pilersitsinngitsumik.

Sikuki Ports A/S umiarsualivinni nunaminertanik attartortitsisarnissamut inatsisitigut tunngavissaqarnersoq nalornissutigineqarsimavoq. Siunnersuut manna aqutugalugu aamma Sikuki Ports A/S-ip umiarsualivinni nunaminertanik attartortitsisinnaanissaanut inatsisitigut ersarissunik tunngavissaqarnissaq qulakkeerneqassaaq.

Umiarsualivinni nunaminertanik attartortitsisinnaanissaq nunani allani umiarsualivinnut atugassarititaasut assigalugit niunernermik tunngaveqarluni ingerlatsisinnaalernissamut pisariaqarpoq. Attartornermut akiliut aalajangersimasumik naliliineq tunngavigalugu attartornermut akiusutut nalinginnaasutut, kaaviiaartitsinermi qularnaveeqqutitut assigisaatulluunniit akilersinneqarsinnaavoq.

Umiarsualivinnik umiarsualinnilu nunaminertanik taakkununga atasunik sanaartornermut aningaasartuutit amerlangaatsiartarput. Isaatitsinissamut periarfissat isaatitsivinnut assigiinngitsunut arlalinnut assigiinngiaartinnerisigut, umiarsualivik Naalakkersuisullu politikkikkut kissaatit naapertorlugit akinik naleqqussaannissamut arlalinnik periarfissaqassapput.

Umiarsualivinni nunaminertanik attartortitsisinnaanermut periarfissat nalornissutaajunnaarpata, tamanna umiarsualivinnut taarsigassarsinissamut periarfissanik pitsaanerulersitsissaaq. Taamaalilluni umiarsualivinni attaveqaasersuutitut amerlanerusunik aningaasaliisoqarsinnaalissaaq, aammalu taamaalilluni innuttaasunut suliffeqarfinnullu, nunatsinni umiarsualivinnik atuisunut pissutsit pitsaanerulissallutik.

2. Siunnersuummi immikkoortut pingaarnerit

Sikuki Ports A/S-ip Kalaallit Nunaanni umiarsualivinnik sanaartornissamut, taarsigassarsinissamut, pisinissamut, pigisaqarnissamut ingerlatsinermullu inatsisitigut tunngavissaqarnissaa siunertaralugu “SIKUKI Nuuk Harbour A/S aamma Nuummi umiarsualiviliorneq pillugit Inatsisartut inatsisaata” allanngortinneqarnissaa siunnersuutigineqarpoq.

Siunertaq anguneqassappat inatsisip aqqa allanngortinneqartussaavoq. Inatsit, Sikuki Ports A/S-ip nuna tamakkerlugu sulisinnaaneranik ersersitsisoq anguniagaammat, inatsit taamaallaat ”Nuummi umiarsualivimmik sananeq”-mut killiliinngitsumik qulequtalerneqartariaqarpoq. Anguniakkamut naapertuutsitsiniarluni siunnersuummi ingerlatseqatigiiffik taamaallaat Sikuki Ports A/S-imik taagorneqarpoq.

Inatsimmi paragrafinut oqaaseq “pisinissaq” ilanngunniarlugu § 1, imm. 4-mut ilanngunneqarpoq, inatsit taamaallaat sanaartornissamut, pigisaqarnissamut ingerlatsinissamullu tunngajunnaarluni aamma pisinissamut tunngalernissaa malunnartinniarlugu. Taamatuttaaq § 1, imm. 4-mi oqaaseq “Nuummi” inatsimmik

allannguiniarnermi siunertamut pingaarnermut naapertuuttunngorlugu “Kalaallit Nunaanni”-mik taarserneqarpoq.

Tamatuma saniatigut kingunerisinnaasanik iluarsiiinerup kingunerisaanik siunnersuut allannguutiniq, Sikuki Ports A/S-ip Nuummi atugarisimasami assingi atorlugit Kalaallit Nunaat tamakkerlugu umiarsualivinnik ingerlatsisinnaaneranut qulakkeeriffiusunik imaqarpoq.

3. Pisortanut aningaasaqarnikkut allaffissornikkullu kingunerisinnaasai

Sikuki Ports A/S umiarsualivinnik, taakkunanilu sanaartukkanik illunillu, taamaalillunilu niuernermik tunngaveqarluni sulianik assingusunik pigisaqartussaavoq, aserfallatsaaliuisartussaavoq, nutarterisartussaavoq ingerlatsisussaallunilu.

Maannarpiaq najukkani umiarsualivinni oqartussaasut suliassaminnik isumaginninnerminnut Nunap Karsianniit akilernerqartarput, aammalu Nuup saniatigut Kalaallit Nunaanni sumiiffinni allani umiarsualivinnik atuinnermut akeqartitsisoqanngilaq. Umiarsualiviit niuernermik tunngaveqarlutik ingerlatsisut tunngaviusumik namminneerlutik aningaasartuutiminnut matussusiisartussaapput.

Sikuki Ports A/S ingerlatseqatigiiffiup niuernermik tunngaveqarluni ingerlatsinera tunngavigalugu umiarsualivinnik tigusaminik ingerlatsissaaq, aserfallatsaaliuisassaaq nutarterisassallunilu. Kisiannili Sikuki Ports A/S-ip umiarsualiviit tamaasa, imaluunniit amerlanersaat tigussappagit, umiarsualivinni aserfallatsaaliuinerit nutarterisarnerrillu aningaasalersorneqarnissaat qulakkeerniarlugu kiffartuussinissamut isumaqatigiissusiornissaq pisariaqalersinnaavoq.

4. Inuussutissarsiortunut aningaasaqarnikkut allaffissornikkullu kingunerisinnaasai

Siunnersuut imminermi inuussutissarsiortut aningaasaqarnerannut allaffissornerannullu kinguneqartussaannngilaq. Sikuki Ports A/S Nuummi suliaqarnermini umiarsualivinnik ingerlatsisuuvoq. Sikuki Ports A/S aterminik allannguinnerminut atatillugu aningaasartuuteqartussaavoq, allagartat, ilisarnaatit allagassiallu il.il. taarsersorneqartussaammata. Aningaasartuutit taakku isumaqangaatsiartussatut naliliiffigineqanngillat.

Siunnersuut umiarsualiviit pillugit Inatsisartut inatsisaannut atasutut isigineqassaaq. Umiarsualiviit pillugit inatsimmi umiarsualiviit namminersortunik pigineqartut ingerlanneqarnissaat inatsisitigut sinaakkusersorneqarput, umiarsualivinnik nunamilu atortut tassunga atasut atorneqarnerinut akiliisitsinissamut periarfissaqartitsisoqarluni, tak.umiarsualiviit pillugit Inatsisartut inatsisaanni § 16. Sikuki Ports A/S-imut tunniussinermi Sikuki Ports A/S umiarsualivinnik atuinnermut akinik, umiarsualivinni ingerlatsinermut aserfallatsaaliuinnermullu aningaasalersuinnermut atorneqartussanik atulersitsissaaq. Siunissami umiarsualivinnik atuinnermut akigitinneqarsinnaasut Naalakkersuisunit akuerineqartassapput.

5. Avatangiisinut, pinngortitamut inuillu peqqissusaannut kingunerisinnaasai

Siunnersuut avatangiisinut pinngortitamullu kinguneqassanngilaq.

6. Inuit Pisinnaatitaaffii aamma innuttaasunut kingunerisinnaasai

Siunnersuut innuttaasut inuttut pisinnaatitaaffiit sunniuteqassanngitsoq naliliisoqarpoq. Aammattaaq siunnersuut innuttaasunut aningaasaqarnikkut imaluunniit allaffissornikkut sunniuteqassanngitsoq naliliisoqarpoq.

Sikuki Ports A/S umiarsualivinnik, aammalu nunami atortunik illunillu taakkununga atasunik, taamaalillunilu sulianik assingusunik pisissappat ingerlatsissappallu, Sikuki Ports A/S siornatigornit amerlanerusunik kiffartuussisinnaalissaaq. Sikuki Ports A/S-imut tunniussisoqassappat, Sikuki Ports A/S umiarsualivinnik atuinnermut akinik, umiarsualivinni ingerlatsinnermut aserfallatsaaliuinnermullu aningaasalersuinnermut atorneqartussanik atulersitsissaaq. Siunissami umiarsualivinnik atuinnermut akigitinneqarsinnaasut Naalakkersuisunit akuerineqartassapput.

7. Kingunerisinnaasai pingaaruteqartut allat

Naliliineq malillugu siunnersuut allanik annertuunik kinguneqassanngilaq.

8. Oqartussanut peqatigiiffinnullu tusarniaaneq

Siunnersuut 19. juuni 2025-mi www.naalakkersuisut.gl-imi tusarniaanernut nittartagaq aqqutigalugu tusarniaassutigineqarpoq, tusarniaanermi akissuteqarnissamut 14. agusti 2025-mut killilerneqarluni. Tamatuma saniatigut siunnersuut tusarniaaffissatut toqqarneqartunut toqqaannartumik nassiunneqarpoq, taakkunungalugu Imarsionermut Ataatsimiititaliaq ilaatinneqarpoq. Tamatuma saniatigut siunnersuut Naalakkersuisoqarfinnut tusarniaassutigineqarpoq.

Tusarniaanermi akissuteqaatit matuma kinguliani issuarneqarput, Naalakkersuisut taakkununga oqaaseqaataat ilanngunneqarlutik.

Sikuki

"Sikuki Nuuk Harbour A/S-imiit ingerlatseqatigiiffiup siunissami suliaqarfissai pillugit Inatsisartut inatsisaannut allannguutissatut siunnersuummut oqaaseqaateqarnissamut periarfissinneqarnerput iluarisimaarparput.

Tamanna tunngavigalugu inatsisissatut siunnersuut misissoqqissaarparput, aammalu tusarniaanermi akissuteqaammi matumani pissutsit, nalileereernitsinni niuerneramik tunngaveqarluta umiarsualivinnik ingerlatsinissamut piumasaqaatinut sinaakkusiussassanik ersarissunik qulakkeerinissaq siunnerfigalugu erseqqissartariaqartutut iluarsisariaqartutulluunniit isumaqarfigisagut pillugit oqaaseqaateqarpugut. Oqaaseqaatit ataatsimut isigalugu naliliinernut, aammalu inatsisissatut siunnersuummi taakkunungalugu oqaaseqaatini toqqarneqartunut oqaaseqaatinut aalajangersimasunut tunngasuupput.

Oqaaseqaatit pingaarnerit:

Inatsisissatut siunnersuut Sikuki-p siunissami suliaqarfissaanik alliliinermik annertuumik imaqarpoq, aammalu oqarsinnaatitaaffiit nutaanik ilaneqarput, taakkunungalu Kalaallit Nunaat tamakkerlugu umiarsualivinnik sananissamut, pigisaqarnissamut ingerlatsinermullu periarfissat, kiisalu umiarsualivinni nunaminertanik illunillu taakkunaniittunik attartortitsisarnerit ilaatinneqarput. Tamatuma peqatigisaanik aningaasaqarnermut akisussaaffeqarnermut sinaakkutissat nutaat arlallit aalajangersarneqarput.

Niuernikkut pissutsit eqqoriaruminassuseqarnissaat inatsisillu ersarinnissaat qulakkeerniarlugu siunnersuutit ilaat erseqqissaavigineqartariaqartutut naliliiffigineqarpoq – pingaartumik umiarsualivinnik pioreersunik tigusisoqassappat, siunissami sanaartugassanut aningaasaliisoqarneranut, akinik aalajangersaanermut attartortitsinermullu piumasaqaatinut tunngatillugu aningaasaqarnermut akisussaaffiit eqqarsaatigalugit.

Sikuki aningaasaqarnikkut piujuartitsiffiusumik niuernermillu tunngavilimmik suliassanik annertusisanik isumaginninniarluni aalajangiisinnaassappat, sinaakkutissat ersarissut pingaaruteqarput. Tamatumunnga atatillugu taarsigassarsinermi pisariaqartinneqarsinnaasumik qularnaveeqqusiisoqassappat, ataatsimut isigalugu naqissusiinermut akitsuusiinnginnissaq aalajangiunneqartariaqarpoq.

Tamatumunnga ilassutitut aamma Nuummi umiarsualivinnik sanaartornissamut ingerlatsinissamullu akuersissummut atuuttumut tunngatillugu tikkuaasoqarpoq, tassanilu utertitsisussaataaneq ingerlatseqatigiiffiup aningaasalersuinissamut periarfissaanut aningaasaliisinnaassuseqarneranullu annertuunik sunniuteqarnerluttussatut naliliiffigineqarpoq.

Tamanna pissutigalugu inassutigineqarpoq, oqimaaqatigiimmik atorsinnaasumillu maleruagassiorneq taperserniarlugu pissutsit matuma kinguliani allassimasut inatsisiliornerup ingerlaqqinnerani ilanngunneqassasut.

1. 3 pillugu. Pisortanut aningaasaqarnikkut allaffissornikkullu kingunerisinnaasai

“Sikuki Ports A/S umiarsualivinnik, taakkunanilu sanaartukkanik illunillu, taamaalillunilu niuernermik tunngaveqarluni sulianik assingusunik pigisaqartussaavoq, aserfallatsaaliisartussaavoq, nutarterisartussaavoq ingerlatsisussaallunilu.”

Oqaaseqaat:

Oqaasertalernerani ersippoq, Sikuki-p umiarsualiveqarfiit pioreersut tigusinnaassagai, kisiannili tunniussinermi umiarsualiviit teknikkimut aningaasaqarnermullu tunngasortaannik naliliinissamut sukumiisunik piumasaqaateqartoqanngilaq, aammalu aningaasaqarnikkut

kinguaattoortoqarsimappat akisussaaffiit agguarneqarnissaannut suleriaasissanik taasisoqanngilaq.

Umiarsualivinnik pioreersunik tunniussinermi taakku pillugit illuatungeriit isumaqatigiissuteqarsimanissaat inatsimmut oqaaseqaatini ersarissarneqassasoq inassutigineqarpoq. Isumaqatigiissummi taamaattumi siumoortumik teknikkimut aningaasaqarnermullu due diligence-mik peqqissaarussamik suliaqartoqarsimanissaa piumasaqaataasariaqarpoq.

Iluarsiissutinut, pilersitsinernut siunissamilu aserfallatsaaliuinnermut pisussaaffinnut aningaasartuutissat sumut atorneqarnissaat siumoortumik paasiniarneqartariaqarput, aammalu illuatungeriit isumaqatiginninniarnernut tunngavissanut ilaatinneqartariaqarlutik. Tamanna annaasaqarfiusinnaasunik agguaanerup ersarinnissaanik qulakkeereqataassaaq, aammalu ingerlatseqatigiiffiup siunissai tigusinissat pillugit aalajangiinissaanut aningaasaqarnikkut piujuartitsiffiusumik tunngaviliissallutik.

2. 3 pillugu. Pisortat aningaasaqarnerannut allaffissornerannullu kingunerisassat

“Kisiannili Sikuki Ports A/S-ip umiarsualiviit tamaasa, imaluunniit taakkunannga amerlasuut tigussappagit, umiarsualivinnik aserfallatsaaliuinnermut nutarterinermulluunniit aningaasalersuisoqarnissaa qulakkeerniarlugu kiffartuussinissamut isumaqatigiissuteqartoqarnissaa pisariaqarsinnaavoq.”

Oqaaseqaat:

Oqaasertaliunneqartuni kiffartuussinissamut isumaqatigiissuteqartoqarnissaata pisariaqalersinnaanera siunnerfigineqarpoq, tamannali isumaqatigiissuteqartoqarnissaanut qularnaveeqqutaasinnaanngilaq – aamma sumiiffinni niuernikkut piujuartitsinissamut tunngavissaqarfiumngitsuni umiarsualivinnik tigusisoqassappat. Sikuki siunissami umiarsualivinnik tigusisarnerni nammineerluni, pisortanit aningaasaqarnikkut tapersorneqarani ingerlatsinermut amigartoorfiusumut aningaasaliissutinullu akiliisassanersoq nalorninartorsiortitsivoq.

Inatsisissamut nassuiaatini tamatuma erseqqissarneqarnissaa inassutigineqarpoq, taamaalilluni umiarsualivinnik tigusisoqassappat siumoortumik Naalakkersuisunut kiffartuussinissamut isumaqatigiissuteqartoqarsimanissaata piumasarineqarnera allassimalissammat. Taamatut erseqqissaassuseqarneq niuernikkut ersarissuseq aammalu Namminersorlutik Oqartussat aamma ingerlatseqatigiiffiup akornanni akisussaassusilimmik annaasaqarfiusinnaasunik agguaanissaq qulakkeerneqassapput.

Siunissami sanaartukkanut aningaasaliisarnissamut tunngatillugu matuma kinguliani Imm. 5, inatsimmi § 5 “Sanaartukkat”-nut tunngasoq innersuussutigineqarpoq.

3. 4 pillugu. Inuussutissarsiortut il.il. aningaasaqarnerannut allaffissornerannullu kingunerisassat

“Sikuki Ports A/S-imut tunniussinermi, Sikuki Ports A/S umiarsualivinniinnermut akinik, umiarsualiviit ingerlanneqarnerinut aserfallatsaaliorneqarnerinullu atugassanik

atuutsitsilissaaq. Siunissami umiarsualivinniinnermut akit atulissappata, Naalakkersuisunit akuerineqartassapput."

Oqaaseqaat:

Oqaatigineqassaaq, maannarpiaq umiarsualivinniinnermut akit ukiumut 2%-it tikillugit iluarsineqarsinnaanissaat periarfissaammat, tamannalu akinik iluarsisarnertit patajaatsumik naaffeqartumillu ingerlanissaasa qulakkeernissaanut sakkussaavoq pingaarutilik. Aaqqissuussinerup tamatuma inatsisip allannngortinneqareernerani ingerlateqqinneqarnissaa naatsorsuutigineqarpoq. Maannarpiaq ukiumoortunik akinik iluarsisarnermut periarfissap ingerlateqqinneqarnissaata erseqqissaatigineqarnissaa inassutigineqarpoq, tamatumalu saniatigut akinik iluarsisarnertit Piffissamut sinaakkusiussassatut aalajangersarneqartut iluanni Naalakkersuisunit suliarineqarsinnaassapput – allaffissornikkut ersarissumik eqaatsumillu ingerlatsinissaa qulakkeerniarlugu.

4. Attartortitsisarnertup annertussusissaa piumasaqaatitallit pillugit

"Sikuki umiarsualivinni nunaminertanik attartortitsinissamut inatsisitigut tunngavissaqarnersoq nalornissutigineqarsimavoq. Siunnersuut manna aqutitigalugu aamma Sikuki-p umiarsualivinni nunaminertanik attartortitsinissaaneranut inatsisitigut ersarissunik tunngavissaqarnissaa qulakkeerneqassaaq."

Aammalu: "Illuutit kiisalu umiarsualivinni nunaminertat umiarsualivinnik ingerlatsinermut ilagitillugit attartortinneqarsinnaapput. Attartorneq aalajangersimasumik naliliineq tunngavigalugu attartornertut nalinginnaasutut, kaaviiaartitsinermut qularnaveeqqutitut assigisaatulluunniit akilersinneqarsinnaapput."

Oqaaseqaatit:

Inatsimmut oqaaseqaatit attartortitsinissamut tunngavissiippat, kisiannili nunaminertat suut, siunertat suut piumasaqaatillu suut atorineqarnissaannut ersarissunik sinaakkusiisoqanngilaq. Tamanna assersuutigalugu politikkikkut allannguinerni imaluunniit ornigunnermi aqutitnut, immikkoorutitut isumaqatigiinngissuteqarnermulhuunniit tunngasut isumaqatigiinngissutigineqarnertit nalornilersitsinissaapput imaluunniit aaqqiagiinngissutigineqalersinnaallutik. Oqaasertalerneqarnertat siammasinnera Sikuki-mut attartortunulluunniit nalornilersitsisarpoq, piffissamullu siviisuumut isumaqatigiissuteqarnertut akornusiisinnaalluni.

Ingerlatseqatigiiffik siunertarisami iluani attartortitsinissamut tamakkiisumik pisinnaatitaaffeqartoq erseqqissarneqassasoq inassutigineqarpoq. Attartortitsinermut piumasaqaatit niuernermit tunngaveqarluni aalajangersarneqarsimanerat allassimasariaqarpoq. Taamaalluni niuernermit tunngaveqarluni umiarsualivinnik ingerlatsinissamut sinaakkutissat ersarissuussapput paasiuminartuussallutillu, aammalu akisussaaffinnik piginnaaneqarfinnillu agguaanissamut nalornissutaasinnaasut annikillisinneqassallutik.

5. *Imm. 5 § 5 "Sanaartukkat" pillugit*

"Sikuki Ports A/S Nuummi umiarsualiviup nutaap pilersaarusiornissaanik sananeqarnissaanillu isumaginnittuussaaq. Umiarsualivik nutaaq Umiarsualiviup Qeqertaani sananeqassaaq."

Sikuki-p siunissami immaqa niuerfimminik annertusititsisinnaanera eqqarsaatigalugu, inatsisip oqaasertaani ingerlatseqatigiiffiup sanaartorfissaata nunami sumiiffimmut eqikkarneqarnissaa naapertuutinnigilaq, siunissami Nuummi avataanilu sanaartugassanut allanut aningaasaliinissaq pisariaqartinneqalersinnaammat, tamannalu pissappat § 5-ip killilersorsinnaanerpa?

§ 5-imut tapiliussassatut una siunnersuutigaarput:

"Sikuki Ports A/S Nuummi umiarsualiviup nutaap pilersaarusiornissaanik sananeqarnissaanillu isumaginnittuussaaq. Umiarsualivik nutaaq Umiarsualiviup Qeqertaani sananeqassaaq. Ingerlatseqatigiiffik siunissami Nuummi, taamatullu Kalaallit Nunaanni illoqarfinni nunaqarfinnilu allani – kiisalu inoqarfinni attuumassutilinni allani – umiarsualiveqarfinnik pilersitsinermi, alliliinermi nutarterinermilu suliaassanik assingusunik suliaqarsinnaavoq."

Sikuki Nuuk Harbour A/S ataatsimut isigalugu qularnaveeqqusiissuteqassaguni naqissusiinermut akitsuummut akiliisinneqassanngilaq."

6. *Immikkoortoq tapiliussaq – akuersissummi atuuttumi piffissamut killiliussap peerneqarnissaanik qinnuteqarneq pillugu*

Sikuki Nuuk Harbour A/S-ip tusarniaanermi akissuteqaammut matumunnga tapiliussatut Nuummi umiarsualivinnik sanaartornissamut ingerlatsinissamullu akuersissut pioreersoq, Naalakkersuisunit tunniunneqartoq, aammalu 3. juuni 2015-imi atuutilersoq eqqumaffigeqquaa.

*Immikkoortup Piumasaqaatit tamanut atuuttut E-mi allassimavoq: **Sikuki-mut ingerlatsinermut, taamatullu umiarsualivinnik sanaartornermut ingerlatsinermullu akuersissutit ukiuni 40-ni atuuttussaapput, umiarsualiviit pillugit Inatsisartut inatsisaanni § 11 naapertorlugu sivitsuinissamut periarfissaqartinneqarlutik.***

Sikuki-p naliliinera naapertorlugu utertitsinissamut pisussaaffeqarneq ingerlatseqatigiiffimmut aningaasalersuinissamut atugassarititaasut unammillersinnaaneriniq, kiisalu piffissat isumakkeerinniffiusussat naapertuunnissaannik angusaqarnissamut sunniuteqarnerhuttussaapput. Siunissaq ungasissoq eqqarsaatigalugu taarsigassarsinermi pissutsit patajaatsut anguneqassappata ingerlatsinermi piginnittoqarnermilu isumannaassuseqarnissaq pisariaqarpoq, aammalu ukiunut 40-nut

killiliineq – sivitsuinissamut periarfissaqartitsisoqaraluartoq – nalorninermik pilersitsivoq, tamannalu akiitsortitsisartunit aningaasaliisartunillu pitsaanngitsutut naliliiffigineqartarpoq. Taamaattumik atugassarititaasut taamaattut aningaasaatinik pitsaasumik ilassusiiniarluni aammalu umiarsualivitsigut attaveqaasersuuteqarnermik ilusiliilluni ineriartortitsiniarluni ilusiliinissamut killiliisarput.

Tamanna tunngavigalugu Sikuki-p inassutigaa, piumasaqaat E, utertitsinissamut pisussaaffeqarnek atorunnaassasoq, taamaalillunilu akuersissut piffissamut killilernagu tunniunneqassasoq, soorlu ingerlatseqatigiiffimmi piginnittoqarnerit ingerlatsinerillu allat taamaattut. Piffissamut killiliinerup atorunnaarsinneqarnerani atugassarititaasunut sinaakkutissat patajaannerusut siunissamullu ungasinnerusumut atuuttut pilersinneqassapput, tamannalu avataaniit aningaasaliisartut unammillersinnaasuni atugassaqaqtitsilluni pileritsatsinnissaannut, isumakkeerinissamut piffissarititaasut naammaginatut qulakkeernissaannut aammalu umiarsualivimmi attaveqaasersuutitut periusissiorluni aningaasaliisarnissat tapersernissaannut pingaaruteqarpoq.

7. Immikkoortoq tapiliussaq – Illoqarfinni aatsitassarsiornermut umiarsualiviit pillugit Siusinnerusukkut illoqarfinni aatsitassarsiornermut umiarsualivinnik sanaatornermut tunngatillugu aatsitassarsiornermut inatsit aamma umiarsualivinnut inatsit imminnut akerleriinnersut nalornissutigineqarluni saqqummiunneqartarsimavoq. Tamatuma nunami sumiiffinnut inissiineq, sinaakkutissat, siunertat atuinerillu ersarissumik nassuiaateqarfiginerisigut inissinneqarnissaa inassutigaarput.”

Akissut

Oqaaseqaatinut pingaarnernut:

IAIN-imiit oqaaseqaatit qujassutigineqarput, aammalu SIKUKI Nuuk Harbour A/S-ip (Sikuki) siunnersuummut oqaaseqaatai suliarilluakkat iluarisimaarneqarput. IAIN-ip oqaaseqaatit sapinngisamik annertunerpaamik ilannguppai. Tamatuma saniatigut apeqqutit paasisalluunniit akissuteqaammi matumani akissuteqarfiginiarneqarput.

1 pillugu:

Umiarsualivinnik tunniussinermi tamanna pillugu isumaqatigiittoqarsimanissaa, kiisalu tekniikkimut aningaasaqarnermullu due diligence-mik peqqissaarussamik suliaqartoqarsimanissaa piumasaqaatitut inatsisissatut siunnersuummut oqaaseqaatinut ilanngunneqarnissaa pisariaqartutut IAIN-imit isumaqarfigineqanngilaq. Umiarsualivinnik tunniussinermi tamatuma imminnut qanilluni pisarnissaa, aammalu tekniikkimut aningaasaqarnermullu due diligence paasinartoq aqqutigalugu pisarnissaa pissusissamisuuginnartutut isigineqarpoq.

Aamma matuma kinguliani imm. 2-mut IAIN-ip SIKUKI-p oqaaseqaataanut akissutaa takoqquneqarpoq.

2 pillugu:

IAIN-ip naliliinera malillugu maannarpiaq suliassamik isumaginninnissamut “kiffartuussinissamut isumaqatigiisummik” isumaqatigiissuteqartoqarnissaanut pisussaaffiliiffiusumik aalajangersagaliortoqarnissaa naapertuutinngilaq. Maannarpiaq killiffimmi umiarsualiviit suut Sikuki-mit tiguneqassanersut politikkikkut paasiniaaffigineqarpoq, taamaattumillu Sikuki-p taamaallaat umiarsualivinnik aningaasaqarnikkut imminut akilersinnaasunik tiguisarnissaa ilimanaateqartorujussuuvoq.

IAIN-ip naliliinera malillugu maannarpiaq suliassamik isumaginninnissamut “kiffartuussinissamut isumaqatigiisummik” isumaqatigiissuteqartoqarnissaanut pisussaaffiliiffiusumik aalajangersagaliortoqarnissaa naapertuutinngilaq. Maannarpiaq killiffimmi umiarsualiviit suut Sikuki-mit tiguneqassanersut politikkikkut paasiniaaffigineqarpoq, taamaattumillu Sikuki-p taamaallaat umiarsualivinnik aningaasaqarnikkut imminut akilersinnaasunik tiguisarnissaa ilimanaateqartorujussuuvoq.

Aamma IAIN-imit erseqqissaatigineqassaaq, umiarsualivinnik ersarissumik amigartooruteqarfiusartunik tunniussisarnissaaq taamaallaat tamanna pillugu isumaqatigiissutit / ”kiffartuussinissamut isumaqatigiissutit” tunngavigalugit pisinnaammat, Sikuki A/S-itut piaarinaatsoorluni amigartooruteqarfiusutut ingerlalersinnaammat.

3 pillugu:

IAIN-ip naliliinera malillugu umiarsualivinniinnermut akit ukiumoortumik iluarsineqartarnissaa inatsimmi allassimanissaa pisariaqanngilaq. IAIN-ip naliliinera malillugu umiarsualivinniinnermut akinik ukiumoortumik iluarsisarnert umiarsualivinnik ataasiakkaanik tigusinissamut isumaqatigiissuteqarnissamut tunngaviusuni aalajangersarneqarpat tamanna naapertuuttussaavoq.

4 pillugu:

IAIN-ip siunnersuummut oqaaseqaatit ilanngullugit allappai.

5 pillugu:

IAIN-ip oqaaseqaatit sapinngisamik annertunerpaamik ilannguppai, taamaalillunilu Sikuki Kalaallit Nunaanni illoqarfinni inoqarfinnilu tamani suliassanik assingusunik isumagisaqarsinnaalissasoq aalajangersakkami allassimalerpoq.

Immikkoortumi naqissusiinnermut akiliisitsinnginnissamut tunngasumut oqaaseqaatinut allanut siunnersuummi § 11-p eqqumaffigineqarnissaa inassutigineqarpoq.

6 pillugu:

IAIN-imit erseqqissaatigineqassaaq, maannarpiaq umiarsualiviit pillugit Inatsisartut inatsisaat iluarsaanneqarluni sulisoqarmat, tassanilu aamma utertitsinissamut pisussaaffiliinissamut piumasaqaat eqqarsaatigineqartunut ilaammat. Taamaattumik atuutsitsinnginnissaaq taanna

maanna siunnersuutaasumut ilanngunneqarnissaa naapertuuttutut isigineqanngilaq. Utertitsinissamut pisussaaffiliisoqassappat umiarsualivinnut inatsimmi, kiisalu umiarsualiviup aalajangersimasup tiguneqarnissaanut isumaqatigiissummi tamanna allassimassaaq.

7 pillugu:

IAIN-imiit erseqqissaatigineqassaaq, aatsitassarsiornermi inatsisip aamma umiarsualivinnut inatsisip akornanni aaqqiissutissanik nassaartoqarsimammat.

Aatsitassarsiornermut Naalakkersuisoqarfik siusinnerusukkut apeqqutitut assingusunut isummersimavoq, tamatumunngalu atatillugu imatut oqaaseqarluni:

” Aatsitassarsiornermut inatsit naapertorlugu aatsitassarsiornermut umiarsualivik taamaallaat sulianut, akuersissutitut aamma/imaluunniit akuerineqarnermut (sioqqanik milluaanerit il.il.) attuumassutilinnik suliaqarniarluni aalajangersinnaavoq. Suli at allat umiarsualivimmi suliarineqarsinnaanngillat.

Naliliinerput malillugu suliffissuaqarnermut umiarsualivik nalinginnaasoq aatsitassarsiornermi sulianut, aammalu umiarsualivinni suliaasanut nalinginnaasunut allanut atorineqarsinnaavoq.”

Visit Greenland

”Visit Greenlandimiit inatsisissatut siunnersuut isumalluarfigineqarpoq, tamannalu aaqqissuusaanermiit suliniutitut pingaarutilittut soqutiginaatilittullu isigineqarpoq. Nuna tamakkerlugu umiarsualivinni sinaakutissanik pitsaanerusunik pilersitsiniarluni suliniut pingaarutilittut soqutiginaatilittullu isigaarput, aammalu Sikuki Ports A/S-ip nuna tamakkerlugu atuuttussanngorlugu annertusineqarnissaata siunertarineqarnera soqutigalugu maluginiarparput. Tamanna umiarsualivinnik ingerlatsinerup ineriartortitsinerullu assigiiarnerusumik inuussutissarsiorfiusumillu ingerlalernissaanut tunngaviliisinnaavoq, tamannalu imaatigut inuussutissarsiornerup takornariaqarnerullu ineriartortinneqarnerini pisariaqaleriartuinnarpoq – pingaartumik sinersorluni takornariartitsisarneq ilanngullugu.

Akisussaassusilimmik takornariaqarnermik ineriartortitsiniarluta periusissiatut malillugit, aammalu Kalaallit sinersorluni takornariartitsisarnermik suliffissuaqarnerannik nalunaarsuineq (2023) tunngavigalugu umiarsualiviit ilusaat nukittunerusut ataqatigiissaakkallu tikeraat misigisassaannut, aammalu najukkani pinsinnaasanut tamarmiusunut tapersiisinaanissaat periarfissaqarluartoq takusinnaavarput. Pingaartumik illoqarfiit inoqarfiillu takornariarfigineqarluartartut, aammalu killilinnik atortullit eqqarsaatigalugit, inatsisissatut siunnersuummi umiarsualivinni attaveqaasersuutitik nutarterinissamut alliliinissamullu periarfissiisoqarnera iluarisimaarnartutut naliliiffigineqarpoq, taakkununngalu tigooqqaanermi atortut tunngaviusumillu atortut, soorlu utaqqisarfiit, allagartalersuinerit iserfissallu ilaatinneqarput.

Nalunaarsuineri sullissisut suleqatillu akornanni akit ilusissaannut sinaakutissat ersarinnerusut, kiisalu akitsuutit inoqarfinnullu aningaasaliissutit aalajangersimasut akornanni qaninnerusumik atassusiisoqarnissaa piumaneqartoq allassimavoq. Tamatuma

peqatigisaanik pisinnaasat, isumannaallisaaneq atortunillu atuisinnaaneq – soorlu pisortat perusuersartarfinnik tamanit atorneqarsinnaasunik – unammillernartortaqartoq tikkuarneqarpoq. Alloriarnerupput pilersitsiviusussat, annertunerusumik isumassarsiuffiusinnaasut. Tamatuma peqatigisaanik naliliivugut, aningaasaliissutit taamaattut atuuffissaat suliat amerliartorneri ilutigitillugit takornariaqarnermut attaveqaasersuutitut tapersiissutitut suli atorneqarsinnaasut.

Isumarput malillugu siunissami umiarsualiveqarnerup Sikuki Ports A/S-ip ataani inissinneqarnissaa kommunit, ornigassanut ingerlatseqatigiiffiit takornariartitsisartullu attuumassutillit allat qanittumik oqaloqatiginerisigut, taamaalillunilu najukkani pissutsit pisariaqartitallu tulleriiaarinernut aaqqiissutissanut ilanngunnerisigut iluaqutaasumik ineriartortinneqarsinnaavoq.

Naliliinerput malillugu inatsisissatut siunnersuut inuussutissarsiornermi najukkanilu inuiaqatigiinni pisariaqartitatut kissaataattullu saqqummiunneqartut naammassinissaannut sinaakkutissanik pilersitsinissamut periarfissanik imaqarpoq. Atuutsitsilertarnerup ingerlaqqinnerani umiarsualivinni takornariaqarnermilu attaveqaasersuutitut najukkaneersunik akuutitsinissap, eqaatsumik aaqqiisarnissap tamakkiisumillu isiginniffiusumik sulinissap aallunneqarnissaa pingaaruteqarpoq.”

Akissut

IAIN-imiit tusarniaanermi akissuteqaat iluarisimaarneqarpoq. IAIN-ip siunnersuutip suliarineqarnerata ingerlaqqinnerani tusarniaanermut akissuteqaat ilanngutissavaa, taamatullu umiarsualivinnik tunniussisoqassappat, Sikuki-p sullissisut attuumassutillit oqaloqatigalugit suliassat ingerlatissavai.

Imarsiornermut siunnersorti Hans Borchersen

”Inatsimmi nutaami, Kalaallit Nunaanni umiarsualivinnik niuernermik tunngaveqarluni ingerlatsinissamut periarfissiiffiusumi eqqarsaatersuutit kusanartorujussuupput. Talittarfiit, aqquutit nalunaarsuutillu aserfallatsaaliorneqartalissapput.

Marlunnik oqaaseqaatissaqarpunga/siunnersuutissaqarpunga:

1. § 6-imi titarnerit pingajuat pillugu. Umiarsualivik quersuarnik sannavinnillu arlalinnik peqarsinnaalluarpoq. Taamaattumik imatut allassimassasoq siunnersuutigerusuppara: ”Sikuki § 1, imm. 4 aamma 5 naapertorlugit ingerlatseqatigiiffiup ilusiata iluani illuutitik sanaartorsinnaavoq pigisaqarsinnaallunilu, taakkunungalu **quersuit, sannaviit**, allaffiit illutaat il.il. ilaatinneqarput.....
2. Immap annertussusiata iluani umiarsualiviup suut atuisinnaatitaaffiginerai pillugu nassuiaat amigaataavoq. Tassani annertussuseq pineqartoq immamut killiliussap iluaniissinnaavoq. Tamatuma saniatigut umiarsualiviup atuisinnaatitaanini assersuutigalugu amutsivinnut, tankeqarfinnut aamma umiarsualivinni sullissisunut attartortissinnaavaa.”

Akissut

IAIN-imiit siunnersuummut oqaaseqaatit iluarisimaarneqarput.

1 pillugu:

Siunnersuutit inatsisissatut siunnersuummut ilanngunneqarput.

2 pillugu:

Siunnersuut inatsisissatut siunnersuummut ilanngunneqarpoq.

Sulisitsisut

"Sulisitsisuniit SIKUKI Nuuk Harbour A/S aamma Nuummi umiarsualiviliorneq pillugu Inatsisartut inatsisaata allanngortinneqarnera pillugu Inatsisartut inatsisaat pillugu siunnersuut tusarniaassutigineqartoq, tusarniaanermi akissuteqarnissamut 21. juuli 2025-mut killilerneqartoq 19. juunimi tiguarput.

Sulisitsisuniit inatsisissatut siunnersuut misissorparput, aammalu aalajangersakkanut ataasiakkaanut imaattunik oqaaseqaatissaqarpugut:

Inatsisissatut siunnersuummi immikkoortunut ataasiakkaanut oqaaseqaatit.

§ 1, imm. 4 pillugu. Inatsisissatut siunnersuummi ingerlatseqatigiiffiup siunertaa annertusillugu Kalaallit Nunaat tamakkerlugu umiarsualivinnik sanaartorneq, pisineq, pigisaqarneq ingerlatsinerlu ilanngunneqarput. Tamanna pitsaasutut naliliiffigineqarpoq, tassani nuna tamakkerlugu imarsiornermut attaveqaasersuutit niuermik tunngavilimmik, aammalu nunap karsianut toqqaannartumik artukkiinnigsumik nukittorsarneqarsinnaalernissaannik kinguneqartussaammat.

§ 6 pillugu. Inatsisissatut siunnersuummi ingerlatseqatigiiffiup umiarsualivimmik ingerlatsinermut ilagitillugu illuutinik umiarsualivimmilu nunaminertanik pigisaqarnissaanik attartortitsisinnaanissaannillu periarfissaqarneq ersarissaatigineqarpoq. Attartortitsinissamut ersarissumik inatsisitigut tunngavissaqarnissaq umiarsualivimmik niuermik tunngaveqarluni ingerlatsinissamut pisariaqartutut naliliiffigineqarpoq.

§ 8 pillugu. Aalajangersakkami Naalakkersuisut nuna tamakkerlugu pilersaarusiortarnermut peqqussusiornikkut ingerlatseqatigiiffiup umiarsualiviutaannut maleruagassanik sukumiisunik aalajangersaanissamut periarfissinneqarput. Naliliinerput malillugu ersarissaaneq taanna, sanaartukkanik allanik pilersaarusiortarnermut ataqatigiissaarinissamut qulakkeerissutaasinnaavoq, aammalu inuussutissarsiornermi inuiaqatigiinnilu soqutigisanut tapersiissutaasinnaalluni.

§ 10 pillugu. Ingerlatseqatigiiffiup aningaasaliissutissanut aningaasalersuinissamut taarsigassarsisinnaanera, umiarsualivinni atortunut nutaaliaasunut aningaasaliinissamut pisariaqartitat tapersernissaannut sakkussatut pingaarutilittut naliliiffigineqarpoq, tamannalu naggataagut inuussutissarsiortunut iluaqutaasinnaavoq.

Pingaartumik atuisut akiliuteqartinneqartarnerinut inuussutissarsiortullu aningaasartuutaannut tunngasut

Tamatumali peqatigisaanik Sulisitsisuniit eqqumaffigeqquneqarpoq, sanaartugassat annerit, atuisut akiliuteqartinneqartarnerisigut aningaasalersorneqartut inuussutissarsiortut aningaasartuutaasa amerlinerinik kinguneqarsinnaammata. Tamanna pingaartumik aningaasaliissutit amerlassusaat peqqutaallutik aningaasalersuinissaq qulakkeerniarlugu qaffasinnerusunik akeqartitsinissap pisariaqartinneqalernerani atuutissaaq. Siunissami akinut politikkini piujuartitsiviusumik aningaasalersuinissamut pisariaqartitsinerup inuussutissarsiortut unammillersinnaanissaannik eqqarsaateqarnermut oqimaaqatigiissitsinissaa pingaaruteqarpoq.

Tamatuma saniatigut nassiussinermut aningaasartuutit kalaallit suliffeqarfiinut annertuumik artorsartitsererput. Umiarsualivinniinnermut akit qaffanneqassappata, tamanna aaqqissuussinermut aningaasartuutitut tamarmiusut annertusititseqqissaaq, tamannalu umiarsualivinnut amerlasuunik aningaasaliissuteqartarnernut atatillugu inuiaqatigiit aningaasaqarnerannut tamarmiusumut ilaatinneqartariaqarpoq.

Sulisitsisuniit nassuerutigineqarpoq, nuna tamakkerlugu, pingaartumillu inuiaqatigiinni minnerusuni, niuernerup ingerlatsinermut naammassineqarsinnaanngiffigisaanni assartuussinermut attaveqaasersuutit ingerlalluartut qulakkeersinnaaniarlugit, Kalaallit Nunaanni pisortat umiarsualivinnik pigisaqarnissaat pisariaqarsinnaammat.

Tamatuma peqatigisaanik sinaakkutissanik, namminersorlutik sullissisut piginnittuunermik imaluunniit ingerlatsinermik pingaarnermik tigusinngikkaluarlutik aningaasaliinernut, kiffartuussinernut nutaaliornernullu akuunissaannut periarfissiiffiusunik pilersitsisoqarnissaa pingaaruteqarpoq. Tamatumani pineqartut tassaasinnaapput terminalinut kiffartuussinernit immikkut ilisimasaqarfiusut, ingerlasussanik piareersaanerit aaqqissuussinernillu, isumaginninnerit, quersuaqarneq imaluunniit suliat niuernerumik tunngaveqartut, umiarsualivinnut attuumassutillit allat.

Umiarsualiviit ingerlatseqatigiiffiit pisortanit pigineqartut aqqutigalugit ingerlanneqartillugit, ingerlatsisut taakku ingerlatsinerup sapinngisamik pitsaasuunissaa, unammillersinnaanissaa aningaasartuutikillisaaffigineqarnissaalu qulakkeerniarlugu immikkut ittunik pisussaaffilerneqartarput, inuussutissarsiortunut, atuisunut innuttaasunullu iluaqutaasumik. Umiarsualivinnik pitsaasumik naammaginatumillu ingerlatsineq avammut annissuineq, tikisitsisarneq suliaqarfiullu iluani pilersuineq eqqarsaatigalugit Kalaallit Nunaanni inuiaqatigiit tamarmiusut aningaasaqarnerannut pingaaruteqarpoq.

Erseqqissaatigineqassaaq, pisut ilaanni atuisut akiliutaannaat eqqarsaatiginagit allaniit aningaasalersuisoqarnissaa eqqarsaatigineqartariaqarmat. Niuerfiit eqqorneqartillugit,

aammalu immikkoortut aningaasartuuteqarfiungaatsiartut mikisut pineqartillugit Nunap Karsia iluaqutaasumik aningaasalersuinnermut tapersiisinnaavoq, tamatumani atuisut ataasiakkaat naapertuutinngitsumik amerlavallaanik aningaasartuuteqarnissaat – taamaalillunilu aamma innuttaasut eqqorneqarnissaat – pinngitsoortinniarlugu. Tamanna pingaartumik attaveqaasersuutitut kinguaattoornerit pioreersut amerlasuut aamma eqqarsaatigineqarpata pisariaqarpoq.

Ataatsimut naliliineq

Naliliinerput malillugu inatsisissatut siunnersuut inuussutissarsiornermut kingunerluuteqartussaannikkallarpoq, kisiannili inassutigaarput, eqqarsaatigisassat matuma siuliani taaneqartut siunissami sanaartornernut atatillugu atuisunut akiliutit akillu qaffasissusissaasa aalajangersarneqarnerini aningaasaqarnermut politikkikkullu eqqarsaatersuutigineqartussanut ilanngunneqassasut.

Sulisitsisut inatsisissatut siunnersuummut saqqummiunneqartumut allanik oqaaseqaatissaqanngillat.”

Akissut

Aallarniutigalugu IAIN-imiit tusarniaanermi akissuteqaammut qujavugut. Isummersuutit IAIN-ip iluarisimaarpai, aammalu inatsisissatut siunnersuutip suliarineqarnerata ingerlatseqqinneranut, kiisalu tamatuma kingorna atuisunut akiliutit, umiarsualivinniinnermut akinik pissutsinillu assigisaannik aalajangersaanermut atatillugu suliassanut ilaatinniarpai.

Nalik Ventures

“Nalik Ventures A/S Kalaallit Nunaanni umiarsualiviit inuussutissarsiorfittut niuernermillu tunngaveqarluni ingerlatsivittut allanngortinneqarnissaannut tapersersuivoq. Tamannami umiarsualivinni tamani, aammattaaq inoqarfinniittuni ineriartortitsinissamut aallaavissatut pingaaruteqarpoq.

Nalik Ventures A/S-ip nuna tamakkerlugu takornariaqarnermik ineriartortitsinermut periusissiaminik aallussinini annertusitippaa, tassanilu takornarianik sullissinermi aammalu inuussutissarsiorfimmi tamarmiusumi ineriartortitsinissamik siunnerfeqarnermi umiarsualiviit pingaarutilimmik inissisimapput.”

Akissut

IAIN-imit tusarniaanermi akissuteqaat iluarisimaarneqarpoq, aammalu oqaaseqaatit inatsisissatut siunnersuutip suliarineqarnerat ingerlaqqinnerani ilanngutissallugit.

Qeqqata Kommunია

”SIKUKI Nuuk Harbour A/S aamma Nuummi umiarsualiviliorneq pillugu Inatsisartut inatsisaata allannngortinneqarnera pillugu Inatsisartut inatsisaata allannngortinneqarnera pillugu tamanut ammasumik tusarniaaneq Qeqqata Kommuniata tigunngilaa. Imarsiornermut ataatsimiititaliami ilaasortaq aqutugalugu inatsisissatut siunnersuuteqartoq aatsaat kommunip paasivaa, taassumallu malitsigisaanik taassumap atortussat nassiullugit.

Kommunip nammineq talittarfiliortitsinermi malitsigisaanik, Sisimiuni Umiarsualivinnik ingerlatseqatigiiffimmik pilersitsinissaq Qeqqata Kommuniata ukiut arlaqartut ingerlanerini sulissutigaa. Inatsit atuuttoq patsisaalluni tamanna pisinnaasimannigilaq. Ilutigisaanik kommuni misigisimavoq, suliap ingerlanneqarnerani kommunit pisariaqartitaat aamma kissaataat akuutinnagit Namminersorlutik Oqartussat SIKUKI pigigaa.

Ullumikkut ingerlatseqatigiiffiit assigiinngitsut marluk, Royal Arctic Line aamma SIKUKI Kangerlussuarmi aamma Nuummi umiarsualivinnik ingerlatsitillugit umiarsualivinnut tunngatillugu ataqatigiinnginneq kommunip siornatigut uparuarnikuuaa. Qeqqata Kommuniata innersuussutigaa, ingerlatseqatigiiffiit taakkua kattunneqassasut imaluunniit inatsimmut allannguutissatut siunnersuutigineqartutut umiarsualivinnik ingerlatsineq Royal Arctic Line-mit, SIKUKI-mut tunniunneqassasooq.

Inatsisissatut siunnersuut malillugu SIKUKI Nuummi nutaamik umiarsualiviliussasooq paasinarmat kommunip Naalakkersuisut sakkortuumik kaammattorusuppai, kilisaataatillit paasiniaaffigeqqullugit. Qeqqata Kommunია talittarfuteqarpoq, raajanik usingiaaffissatut atugassanngorlugu kilisaatinut talittarfissanngortitassaqqissumik.

Kommunit ataasiakkaat pisariaqartitaat, ineriartortitsinissamullu periarfissaat annertunerusumik eqqarsaatigineqartussanngorlugit nunami ingerlatseqatigiiffinnut, matumani SIKUKI aamma Royal Arctic Line ilanngullugit, qitiusumit aqutsinerup annikillisarneqarnissaata pingaaruteqassusia, Qeqqata Kommuniata inaarutaasumik erseqqissaatigerusuppaa.”

Akissut

Tusarniummut akissut IAIN-ip pingaartippaa, suliallu ingerlateqqinnissaanut ilanngutissallugu. Umiarsualivinnik Sikuki-mut tunniussisoqassappat, tamanna inuiaqatigiinnut, inuussutissarsiutilinnut, kommuninullu iluaqutissanngorlugu aaqqissuunneqarlunilu ataqatigiissaarneqassaaq, soorluttaaq pisariaqartitat aamma ineriartortitsinissamut periarfissat eqqarsaatigineqassasut.

SIRIUS Greenland ApS

”SIKUKI Nuuk Harbour A/S aamma ingerlatseqatigiiffiup ingerlatsinerata Kalaallit Nunaannut tamarmut annertusineqarnissaa pillugu inatsisartut inatsisaata

allanngortinneqarnissaata pillugu siunnersuummut saqqummiunneqartumut matumunna tusarniummut akissuteqarusuppugut.

Qeqqata Kommuniata pingaarnertut inerniliusnaanut isumaqataavugut: Kalaallit Nunaanni umiarsualiviit ataqatigiissaarneqarnerusariaqarput, piujuartussamillu aaqqissuunneqartariaqarlutik, aallaavittullu akisussaaffik aamma ingerlatsineq ingerlatsisumut ilisimasalimmuut ataatsimut ataatsimoortinneqarunik ajunnginnerussalluni. Tamannali aalajangiinissamik, isumalluutinillu Nuummumut qitiusunngortitseqqinnissamik kinguneqannginnissaa aalajangiisuvoq – soorlu ajorluartumik Royal Arctic Line-mi taamatut pisoqartoq.

Suliffeqarfittut nunap immikkoortortaani ulluinnarni ingerlatsisutut, nassiussalerinermillu pinngitsuuissinnaanngitsutut qitiusunngorsaaneq innuttaasut 2/3-iinut, tassaasut illoqarfiit pingaarnersaata avataani najugaqartuusunut, inuussutissarsiutiliusunullu toqqaannartumik qanoq sunniuteqarnerlutsiginersoq misiginikuuarput. Aningaasaqarneq, ingerlatsineq, nassiussalerineq, niuernerlu isigalugit periuseq tamanna najukkami pisariaqartitanut pitsaasimanngilaq, eqaassimanngilaq, sanngiissimallunilu. Tamanna pillugu ersarilluinnartariaqarpoq:

Siunissami ingerlatseqatigiiffissaq sunaluunniit nuna tamakkerlugu umiarsualivinnik ingerlatsinermik akisussaaffeqartussaq, ingerlatsisut piusut akuutinneqarnerisigut aamma nunap immikkoortortaanni kommunit aamma namminersortut najukkami ingerlataat, akuunerallu ataqqillugit pilersinneqassaaq. Naapertuilluarneq kisimi pineqarani – umiarsualiviit najukkami pisariaqartitanut naapertuuttut qulakkeerneqarnissaanni, siunissamullu qulakkeerneqarnissaannut pisariaqarpoq.

Taamaalilluni siunnersuut qitiusumit aqutsinerup annikillisarneqarnissaanut ersarissumik periusissiamik, matumanilu nunap immikkoortortaani umiarsualiviit, umiarsuaateqarfiit, inuussutissarsiutinillu ingerlatsisut ilanngullugit najukkami inuiaqatigiit peqatigalugit aammasumik, pisussaaffiliisumillu suleqatigiinnissamik periusissiamik ilaqassappat aatsaat siunnersuut tapersorsorparput.”

Akissut

Tusarniummut akissut IAIN-ip pingaartippaa, suliallu ingerlateqqinnissaanut ilanngutissallugu. Umiarsualivinnik Sikuki-mut tunniussisoqassappat, tamanna inuiaqatigiinnut, inuussutissarsiutilinnut, kommuninullu iluaqutaassaaq, najukkamilu ingerlatsisut attuumassuteqartut suleqatigineqassallutik. IAIN-ip naatsorsuutigaa umiarsualiviit ilaannik tunniussineq najukkami ingerlatsisunut, matumani aamma inuussutissarsiutilinnut, innuttaasunut, kommuninullu iluaqutaassasoq. Piginnittuunermut politikki malillugu, Namminersorlutik Oqartussat ingerlatseqatigiiffiutaasa qanitarisami inuiaqatigiit suleqatigissavaat. Tamanna pillugu IAIN isumaqarpoq, tamanna Sikuki pillugu inatsimmi toqqaannartumik inatsisiliunneqarnissaa naleqqutinngitsoq.

Siunnersuummi aalajangersakkanut ataasiakkaanut nassuiaatit*§ 1-imut*

Nr. 1-imut

Allannguutissani Sikuki Ports A/S-ip Nuummi nunallu sinnerani umiarsualivinnik sanasinnaanera, pisinnaanera, pigisaqarsinnaanera ingerlatsisinnaaneralu pillugu ersarissanissaq siunertarineqarpoq. Siunertaq taanna “SIKUKI Nuuk Harbour A/S aamma Nuummi umiarsualiviliorneq pillugit Inatsisartut inatsisaat nr. 17, 3. juuni 2015-imeersoq”-mut allannguutissamik inatsisiliornikkut anguniarneqarpoq.

Siunertaq anguniarlugu aallaqqaammut inatsisip qulequtaa allanngortinneqarpoq. Inatsimmi Sikuki Ports A/S-ip nuna tamakkerlugu sulisinnaanissaa anguniarneqarmat, inatsisip qulequtaani “Nuummi umiarsualivimmik sananissaq” killiliisariaqanngilaq. Anguniagaq tamanna naapertorlugu ingerlatseqatigiiffik siunnersuummi taamaallaat Sikuki Ports A/S-imik taagorneqarpoq.

Tamatuma kingorna inatsisip aqqa tassaalerpoq Sikuki Ports A/S pillugu Inatsisartut inatsisaat.

Nr. 2-mut

§ 1, imm. 2-p oqaasertaasa imatut allanngortinneqarnissaat siunnersuutigineqarpoq: ”Ingerlatseqatigiiffiup aqqa tassaavoq Sikuki Ports A/S. Ingerlatseqatigiiffik saniatigut atit allat atorlugit ingerlatsisinnaavoq.” Sikuki Ports A/S-ip Kalaallit Nunaat tamakkerlugu umiarsualivinnik piginnittuusinnaanera ingerlatsisinnaaneralu erseqqissarniarlugu ingerlatseqatigiiffiup aqqa allanngortinneqarpoq.

Nr. 3-mut

§ 1, imm. 4-p oqaasertaasa imatut allanngortinneqarnissaat siunnersuutigineqarpoq: ”Ingerlatseqatigiiffiup niuernermik tunngaveqarluni Kalaallit Nunaanni umiarsualivinnik, aammalu nunami atortunik illunillu taakkununnga atasunik, taamaalillunilu suliaassanik attuumassutilinnik suliaqarnissamut atugassanik sananissaq, pisinissaq, pigisaqarnissaq ingerlatsinissarlu siunertarai.”

Taamaalilluni oqaaseq “pisinissaq” ilanngunneqarpoq, inatsit umiarsualivinnik sananermut, pigisaqarnermut ingerlatsinermullu tunngaannarani aamma pisinissap ilaatinneqalernera ersarissarniarlugu.

Oqaaseq “Nuummi” taarserlugu “Kalaallit Nunaanni”-p allanneqarnissaa siunnersuutigineqarpoq, Sikuki Ports A/S-ip Nuummi, taamatullu nunap sinnerani sulisinnaaneranik anguniagaqarneq pingaarnaq naapertorlugu. Kiisalu oqaaseq “illut” ilanngunneqarpoq, niuerfiup tamatuma immikkoornera malunnartinniarlugu.

Nr. 4-mut

Immikkoortup qulequtaa *Sanaartukkat* imatut oqaasertalerneqassaaq: “Sanaartorneq”, allannguinermilu erseqqissarniarneqarpoq, tamatumani Nuummi umiarsualivimmi sanaartorneq kisimi pineqarunnaartoq.

Nr. 5-imut

§ 5, imm. 1-imi ingerlatseqatigiiffiup aqqa allanngortinneqarpoq. Tamatuma peqatigisaanik aalajangersagaq allanngortinneqarpoq, taamaalillunilu Sikuki Ports A/S-ip Kalaallit Nunaat tamakkerlugu umiarsualiviliorsinnaanera ersarissarneqarpoq.

Nr. 6-imut

§ 5, imm. 2 atorunnaarsinneqassasoq siunnersuutigineqarpoq. Immikkoortup immikkoortuata siulliup atorunnaarsinneqassaaq, aalajangersagaq pisoqalisimammat. Umiarsualivik sananeqareerpoq, aammalu siunissami umiarsualivinnik pisariaqartitsineq sanaartukkat ataasakkaat misissuiffigineqarnerisigut inissinneqassaaq. Taamaattumik siunissami sanaartugassat ilusilersornissaannut natsisitigut piumasaqaateqartoqarnissaa naapertuuttutut isigineqanngilaq. Tamatuma saniatigut erseqqissaatigineqassaaq. Nuummut nunap assinga ilanngussatut ilaliunneqanngimmat, aammalu inatsisip maannamut tamanna pillugu oqaasertai kukkusuummata.

Nr. 7-imut

§ 6-p oqaasertaasa imatut allanngortinneqarnissaat siunnersuutigineqarpoq: “Sikuki Ports A/S tak. § 1, imm. 4 aamma 5 naapertorlugu ingerlatseqatigiiffiup siunertaasa iluanni illunik sanasinnaavoq pigisaqarsinnaallunilu, taakkununnгалu quersuit, sannaviit, allaffiit illutaat il.il. ilaatinneqarput. Illut, kiisalu umiarsualivinni nunaminertat umiarsualivinnik ingerlatsinermut atatillugu attartortinneqarsinnaapput.” Allannguinermi ingerlatseqatigiiffiup aqqa iluarsineqassaaq, taamatullu ingerlatseqatigiiffiup siunertaasa iluanni ingerlatseqatigiiffiup illunik sanasinnaanissaa pigisaqarsinnaanissaalu, tassungalu ilanngullugu pisisnaanissaa qulakkeerneqassaaq. Tamatuma saniatigut allannguinermi ingerlatseqatigiiffiup umiarsualivinni suliaqarnerminut atatillugu umiarsualivinni nunaminertanik illunillu niuernerminik tunngaveqarluni attartortitsisinaanissaa qulakkeerneqassaaq. Attartornermut akiliut aalajangersimasumik naliliineq tunngavigalugu attartornermut akiusutut nalinginnaasutut, kaaviiartitsinermin qularnaveeqqutitut assigisaatulluunniit akilersinneqarsinnaavoq.

Umiarsualivinni nunaminertanut aamma Sikuki Ports A/S-ip umiarsualiviisa killeqarfiisa iluanni Sikuki Ports A/S-ip atuisinnaatitaaffigisaasa imartaanni imartat annertussusilikkat ilaatinneqarput.

Nr. 8-mut

§ 7, imm. 1-ip allanngortinneqarnissaa siunnersuutigineqarpoq, taamaalilluni Sikuki Ports A/S-ip Kalaallit Nunaat tamakkerlugu umiarsualivinnik ingerlatsisinnaanera ersarissarneqassalluni.

Nr. 9-mut

Taamatuttaaq § 7, imm. 2-p atorunnaarsinneqarnissaa siunnersuutigineqarpoq. Aalajangersakkami allassimavoq, aqqusernit aqquusersuutillu inatsimmut ilanngussaq 2-mi takuneqarsinnaasut. Nunap assinga ilanngussatut ilaliunneqanngilaq, aammalu inatsisip maannamut oqaasertarisai kukkusuupput.

Nr. 10-mit

§ 8-p allanngortinneqarnissaa siunnersuutigineqarpoq, taamaalillunilu ingerlatseqatigiiffiup Nuummi umiarsualivimmik ingerlatsinerani atugassarititaasut assingi atorlugit Kalaallit Nunaat tamakkerlugu umiarsualivinnik ingerlatsisinnaanera qulakkeerneqassaaq.

Nr. 11-mut

§ 10-p allanngortinneqarnissaa siunnersuutigineqarpoq, ingerlatseqatigiiffiup aqqa iluarsineqassalluni, taamatullu ingerlatseqatigiiffiup nammineerluni siunertarisami iluani aningaasalersuinissamut taarsigassarsisinnaanissaa qulakkeerneqarluni.

Nr. 12-imut

§ 11-p allanngortinneqarnissaa siunnersuutigineqarpoq, ingerlatseqatigiiffiup inatsit taanna naapertorlugu suliaasa pisortanut naqissusiinermut akitsuutinik akiliinnginnissaa qulakkeerniarlugu. Aalajangersakkami siusinnerusukkut Nuummi umiarsualiviup sananeqarnerani naqissusiinermut akitsuutinik akiliinnginnissaaq atuutsinneqartoq ingerlateqqinneqarpoq.

§ 2-mut

Allannguutissatut siunnersuutip 1. juuli 2026-mi atuutilernissaa siunnersuutigineqarpoq.

Ilanngussaq 1

Siunnersuutip inatsimmut atuuttumut sanilliunneqarnera	
<i>Oqaasertaliussat atuuttut</i>	<i>Siunnersuut</i>
	§ 1 SIKUKI Nuuk Harbour A/S aamma Nuummi umiarsualiviliorneq pillugit Inatsisartut inatsisaat nr. 17, 3. juuni 2015-imeersoq imatut allannguuteqartinneqassaaq:
SIKUKI Nuuk Harbour A/S aamma Nuummi umiarsualiviliorneq pillugit Inatsisartut inatsisaat	1. Peqqussutip qulequtaa imatut allanneqassaaq: ”Sikuki Ports A/S pillugu Inatsisartut inatsisaat”.
§ 1, imm. 2: <i>Imm. 2.</i> Ingerlatseqatigiiffik taaguuteqarpoq SIKUKI Nuuk Harbour A/S. ingerlatseqatigiiffik allanik saniatigut taaguuteqartunik suliffeqarfimmik ingerlatsisinnaavoq.	2. § 1, imm. 2 imatut oqaasertalerneqassaaq: ”<i>Imm. 2.</i> Ingerlatseqatigiiffiup aqqa tassaavoq Sikuki Ports A/S. Ingerlatseqatigiiffik saniatigut atit allat atorlugit ingerlatsisinnaavoq.”
§ 1, imm. 4: <i>Imm. 4.</i> Ingerlatseqatigiiffiup siunertaraa niuermik tunngaveqartumik umiarsualivimmik Nuummi nunami sanaartugartaqartumi taassumunngalu assingusumik suliffeqarfittaqtumik sananissaq, piginnittuunissaq aamma ingerlatsinissaq.	3. § 1, imm. 4 imatut oqaasertalerneqassaaq: ”<i>Imm. 4.</i> Ingerlatseqatigiiffiup niuermik tunngaveqarluni Kalaallit Nunaanni umiarsualivinnik, aammalu nunami atortunik illunillu taakkununga atasunik, taamaalillunilu suliassanik attuumassutilinnik suliaqarnissamut atugassanik sananissaq, pisinissaq, pigisaqarnissaq ingerlatsinissarluni siunertarai.”
§ 4-p qulequtaa ” <i>Sanaartukkat</i> ”	4. § 4-p qulequtaa imatut oqaasertalerneqassaaq: ”<i>Sanaartorneq</i>”
§ 5, imm. 1:	5. § 5, imm. 1 imatut oqaasertalerneqassaaq:

SIKUKI Nuuk Harbour A/S Nuummi umiarsualivissap nutaap pilersaarusiorneqarnera sananeqarneralu isumagissavaa. Umiarsualivik nutaaq Umiarsualiviup qeqertaanni sananeqassaaq.	”Sikuki Ports A/S § 1, imm. 4-mi siunertarisami iluani Kalaallit Nunaanni umiarsualivinnik pilersaarusiornermik sanaartornermillu suliaqarsinnaavoq.”
§ 5, imm. 2: <i>Imm. 2.</i> Umiarsualivik nutaaq talittarfeqartillugu, umiarsualiviup iluani assartuussinermut aqqusineqartillugu aamma usinik uninngasuuteqarnissamut passussinissamullu nunaminertaqartillugu sananeqassaaq. Nuup umiarsualivianut nutaamut nunami sanaartugartaqartumut nunap assinga ilanngussaq 1-itut ilanngunneqarpoq. Nunap assinga ilanngussaq ilitersuussutaavoq. Annertussusaa, inissisimaffia aamma ilusilersorneqarnera inaarutaasumik pilersaarusiorneqarneranut sananeqarneranullu ilaatillugu allanngortinneqarsinnaapput.	6. § 5, imm. 2 atorunnaassaaq.
§ 6. SIKUKI Nuuk Harbour A/S Nuummi umiarsualivimmi nutaami illuutininik arlalinnik sanaartorsinnaavoq, ilanngullugit quersuaq, sullivik, allaffeqarfiit illutaat il.il. Illuutit umiarsualiviup ingerlanneqarneranut ilaatillugu attartortinneqarsinnaapput.	7. § 6 imatut oqaasertalerneqassaaq: “§ 6. Sikuki Ports A/S § 1, imm. 4 aamma 5 naapertorlugu ingerlatseqatigiiffiup siunertaasa iluanni illunik sanasinnaavoq pigisaqarsinnaallunilu, taakkunungalu quersuit, sannaviit, allaffiit illutaat il.il. ilaatinneqarput. Illut, kiisalu umiarsualivinni nunaminertat umiarsualivinnik ingerlatsinermut atatillugu attartortinneqarsinnaapput.”
§ 7, imm. 1: Naalakkersuisut nuna tamakkerlugu pilersaarusiornermi soqutigisanik isumaginninnermut ilaatillugu, Nuummi umiarsualivimmik nutaamik sananermut atatillugu kommunip sanaartorfigiuminarsaananeranut aningaasartuutit aammalu akilernissai	8. § 7, stk. 1 imatut oqaasertalerneqassaaq: “Naalakkersuisut nuna tamakkerlugu pilersaarusiortarnermi soqutigisat isumagineqarnissaat qulakkeerniarlugu Sikuki Ports A/S-ip Kalaallit Nunaanni nutaanik umiarsualiviliornerannut atatillugu kommunimi sanaartorfissagissaanissaq

pillugit isumaqatigiissuteqarsinnaapput.	pillugu isumaqatigiissuteqarsinnaapput aningaasartuutinullu akiliisinnaallutik.”
§ 7, imm. 2: <i>Imm. 2.</i> Aqqusernit aqqusersuutillu ingerlaarfissaannut nunap assinga ilanngussaq 2-itut ilanngunneqarpoq. Nunap assinga ilanngussaq ilitsersuussutaavoq. Annertussusaa, inissisimaffia aamma ilusilersorneqarnera inaarutaasumik pilersaarusiorneqarneranut sananeqarneranullu ilaatillugu allanngortinneqarsinnaapput.	9. § 7, imm. 2 atorunnaassaaq.
§ 8. Naalakkersuisut Nuummi umiarsualivimmik nutaamik nunami sanaartugartaqartumik aamma illuutitaqartumik sananermut aalajangersakkat erseqqinnerusut pilersaarusiornermi nuna tamakkerlugu malitassani akuerisinnaavaat. <i>Imm. 2.</i> Naalakkersuisut aalajangiisinnaapput, pilersaarusiornermi nuna tamakkerlugu malitassat, sumiiffiup ilaata Nuummi nutaamik umiarsualivimmik nunami sanaartugartaqartumik illuutitaqartumillu sananermut atorneqarnissaanut sukumiisunik aalajangersagartaqartoq, kommunimut pilersaarutitut inatsisitigut sunniuteqassasut.	10. § 8 imatut oqaasertalerneqassaaq: ” § 8. Naalakkersuisut nuna tamakkerlugu pilersaarusiortarnermut peqqussummi Sikuki Ports A/S-ip Kalaallit Nunaanni umiarsualivinnik, aammalu nunami atortunik illunillu taakkununga atasunik sanaartorneranut aalajangersakkanik sukumiisunik akuersissuteqarsinnaapput. <i>Imm. 2.</i> Naalakkersuisut nuna tamakkerlugu peqqussummik, sumiiffiup ilaata Sikuki Ports A/S-ip umiarsualivinnik nutaanik, aammalu nunami atortunik illunillu taakkununga atasunik sanaartorneranut, kiisalu ingerlatseqatigiiffiup umiarsualiviutaannik, aammalu nunami atortunik illunillu taakkununga atasunik alliliineranut atorneqartussanut aalajangersakkanik sukumiisunik kommunimi pilersaarutitut inatsisitigut atuutsitsisoqalissanersaq aalajangiisinnaapput.”
§ 10. SIKUKI Nuuk Harbour A/S Nuummi umiarsualivimmik nutaamik sananissamut pilersaarusiornernup sananerullu aammalu umiarsualivimmi illuutininik arlalinnik sananerup, aningaasalersorneqarnissaannut	11. § 10 imatut oqaasertalerneqassaaq: “§ 10. Sikuki Ports A/S siunertaqarfigisami iluani aningaasalersuinissamut taarsigassarsisinnaavoq, tak. § 1, imm. 4 aamma 5.”

taarsigassarsisinnaavoq. Ataatsimeersuarnermi ingerlatseqatigiiffiup taarsigassarsinissaa akuersissuteqarfigineqassaaq.	
§ 11. Allakkiat uppersarsaatit, taarsigassarsinermut uppersarsaatit, pappialanngortitat aamma uppersarsaatit atsiukkat il.il. sanaartornermut inatsimmi matumani pineqartumut atatillugu suliarineqartut, pisortanut naqissusiinermut akitsuusiinikkut akileraaruserneqassanngillat.	12. § 11 imatut oqaasertalerneqassaaq: ” § 11. Allagaatit, taarsigassarsinermut uppersarsaatit, naqitat uppersarsaatillu il.il., Sikuki Ports A/S-ip suliaanut, inatsimmut matumunnga ilaatinneqartunut atatillugu suliarineqartut pisortaniit naqissusiinermut akitsuuserneqassanngillat.”
	§ 2 Inatsisartut inatsisaat 1. juli 2026-mi atuutilerpoq.